

全華叢書



金華叢書



宋學士全集卷之二十九

明宋濂撰

同郡後學胡鳳丹月樵校梓

辭凡三十八章

思嬾人辭

吾鄉呂成公實接中原文獻之傳公歿始餘百年而其學殆絕濂竊病之然公之所學弗畔於孔子之道者也欲學孔子當必自公始此生乎公之鄉者所宜深省也嗟夫公骨雖朽公所著之書猶存古之君子有曠百世而相感者況與公相去又如此之甚近乎

聞而知之蓋必有其人矣託物引類作思媿人辭辭

曰

惟媿人之情媿兮賦姱質於自然修蛾規而凝黛兮
曼目轉以成睵安鬢髮而如雲兮靨輔巧以承權纖
腰秀頸若鮮卑兮容都曼而體便娟寶璐榮而右繞
兮桂徽媚以半偃懸明月以綴佩兮錯木難而傅冠
向瑤臺而微步兮意憺靜以貞閒宓妃之倫折芳馨
以相遺兮復容與乎江干勢翩翩其褰舉兮若游龍
之在淵胡人閒不可以久留兮逐凌厲乎高寒馮道

紀以爲御兮鍊天和而爲餐徑驅馭於陽陰兮時上
下乎星辰款予生之何晚兮不一覲於芳儀念姱婁
之鮮雙兮遡迴飈而曾思歆愁悴而委情兮氣涓漚
以如炊道苟可以遡之兮視萬里猶門墀登嶇嶸而
騁望兮正晨旭之蒼涼氣曠豁而闔朗兮莽山川之
縱橫樹輪盤糾而柴瓠兮蘋草藿靡以相望豐狐思
羣而永嗥兮文鵠慕類以徐翔企精爽之不徠兮空
雲龍之將將蹇佗傖而望絕兮耀靈習其西藏降崇
丘而臨曠野兮循故轍以東歸向闌楯而徙倚兮境

外嬰而愁內滋新蟾皎以出天兮想纖美之曲眉繁
星爛而成文兮懷繡帔之陸離蒼灝霸落而無滓兮
思玉體之弗緇拂蘭袖而起步兮復經緯乎空庭苦
鴻鴈之靡靡兮厭羽蟲之薨薨撼戶櫬以悲惻兮惕
厭容而弗自勝轉曲牖而入堂壇兮牀獨坐對乎華
鐙鐙影搖曳如鳥旻兮象中心之靡寧寒厖狺狺而
競吠兮耳恍聞於楚音疾倒屣以啓關兮飈鬬葉於
枯岑縹綿綿而莫抒兮託幽寄於瑤琴琴聲咽而思
深兮類孤鶴之鳴陰更寂莫以將闌兮斗杓旋而向

東舒枕衾而就榻兮期夢寐以潛通精氣注以弗釋
兮橋有物而衡中息纒纒以方微兮魂翕翕而上征
造旬始而謁太儀兮羣靈續其若叢氛旋溶以隨焱
兮鳳旂沛而嬰空馭象車而秉虬節兮鞭列缺以斥
豐隆豹纛熊幡聿皇以奮兮樛流紆譎鬱以相蒙左
攜右衛動以綳張兮倏腴倩泐雲滃而雷春回穴幡
纒汨以崦歛兮吸鼻瀟率藹以蒙鴻穆眇眇以前邁
兮翩紛紛而弗止莽冥冥以無垠兮勢皇皇而迤靡
超氛埃而淑郵兮竟按轡乎朱陵長麗舉噉以向日

兮有赫戲之華文揚芒燦以上焱兮繁重離之丹門
炫赤玉之寶章兮列八龍之威神歟東趨於蒼極兮
青瑀紛其並迎羣神衍衍以方饗兮奏靈和之鳳笙
四酎芬而凍飲兮暈玉色而帶蘋揖素威以升皓宮
兮盼四極之浮浮尋收顧余而破顏兮錫鏤瓊之華
鉤謂貞白以自守兮合左契於伊周折寒門而燭元
冥兮朔颶颯以吹裘有夫黃巾而環甲兮握靈蛇以
爲驅重陰沍而未啓兮肅紫氛之幽幽四方非不可
居兮悵所思之莫余都馳兩轂如飛丸兮又滔滔而

遐逝靈氛告余以吉故兮予何爲兮獨悲若彼中天
之有居兮隔人世之風雨吾將導子之一至今庶弗
愆於恆素惻忽荒以從之兮駕剛飈以徑度習光炎
之炘炘兮絺纚鬱決而不可正視瑀薨彤楹屹以上
起兮瀏濫弘恂雲譎而波詭連卷欂峴以軋芴兮
歲魁幼眇轟以高峙中洞房之沕穆兮乃媿人之攸
居使曼姬爲予通訊兮儼再拜乎堂垂帟朱扉之洞
開兮移玉趾之委蛇珠明玉潔不足以爲喻兮光照
耀乎東西吐芳辭以若蘭兮意勤勤而告余曰皇降

靈兮昭質弗沫毋染爾穢兮昧厥施紉葯襦兮曳芷
施結蕙纓兮張椒幃兮桂漿兮嚙蓀麋索胡繩兮哇
揭車集眾芳以遠蒸兮羌郁郁而斐斐余俯首而敬
聽兮書輦紳以自規海色動而報曙兮陶去幽而開
寤雖嘉辭之盈耳兮邈若人其何處遂捫膺以沈思
兮顓獨處而繚戾也誠因言以會心兮將神交於千
載也亘天地而無初終兮惟我民之秉彝道弘敷於
上下兮必有人而繫之往者固不可作兮幸方冊之
昭如日參驗於厥躬兮若面命而耳提跛鼃之嬖姍

兮固難齊於六驥能孳孳而弗怠兮亦千里之可至
余雖質駘而力單兮敢不沾沾而奮厲帶鈎矩而佩
衡兮撤部蒙而祛尉期有形以必踐兮始俯仰而無
媿縱不得媿人以與之游兮又何異同功而並世既
爲此辭嘗錄一通寄王子充子充蓋有志同予
學呂者書以識之庸俟異日各考其學之成也

青山辭

青山崔崔白雲溶溶我疑其中仙人所宮風馬雲輿
霓旌羽幢游行太空翩然相從望而不見使我心忡
我本金華牧羊之童口誦藥笈有聲如鍾震撼岩壑

無礙不通謫居下土黃塵濛濛五色之文布滿西東
秋高露清陟彼危峯呼吸元氣精神內融嘯傲萬物
後天而終

雲中辭

黃巖有奇士曰許君弼其字廷輔治周易煜然以文
名會天下紛擾輒被鐵衣操虵矛集兵以禦寇尤能
挽強命中眾初弗信君設正鵠一百八十步外挾弓
矢以往轟然一發輒中之乃皆歎服由是多驅馳戎
馬閒及天兵取台州四方次第平大興文治建科目

以取士君慨然曰聖天子在上可以出而仕矣起應
書鄉闈遂取浙江第二名君文解去通判沔陽府掬
煩劇如庖丁解牛恢恢乎投刃而有餘地已而復慨
然曰予家之東有委羽山其高摩天委羽之下又有
桃山焉羣峯相與回環日未出常有雲氣起其閒縹
緲輕盈如兜羅綿籠罩崖谷如翔如舞絕可愛玩有
時下覆欄宇覺此身飄然在雲之中恍欲逐黃鶴仙
人吹簫而往來也第以君恩未報不敢決去他時髮
種種當掛冠而歸與雲爲朋姑以雲中生自號蓋以

表其志云夫雲之爲物出乎太虛歛然而有忽然而無其變幻有不可測者當長空晴妍紆徐其興結而爲祥鸞散而爲綺霞其文采郁如也及其黢黢鬱勃銖馬長驅雷電爲之恍惚而甘霖注焉嗚呼雲哉何其有類於君也然非雲之類君實君有取於雲也樂繁華者贈勺藥以相娛務高潔者貯秋菊以爲糧物何嘗有心而人自強同之爾予方與君談雲中之趣君忽昂然而來顧予言曰弼知誦子之文久矣盍爲賦雲中辭乎予聞君襟韻洒落得喪一歸於天故其

顏四時無憂色其號爲雲中也亦宜爲之辭曰委羽
之山兮雲薄之勢輪囷兮復嶙嶸膚寸而合兮既合
而復離不崇朝兮雨渺渺渺兮雲之歸立功泯泯
兮邈難知嗟爾雲中之人兮胡不爾思或出兮或處
兮恆與雲以相期

協晨中寥辭一首

鬼谷仙人畫列禦寇御風圖以獻其師四十一代天
師真人真人號沖虛子而唐封禦寇之號實曰沖虛
此其圖之所以作歟濂竊觀之髯松奮張有風泠泠

然起於其中霞光發舒閃鑠無定禦寇方乘颺回旋
龍裳鸞帶淩亂不可止遙見神山隱起大瀛海上旭
日一點如火海濤噴薄迎之濺沫而舞珠景物遼寬
令人情塵銷賁直超鴻濛間嗚呼仙人之畫奇絕矣
蓋以媿真人非果在於禦寇也真人或飛神上謁太
清排空馭氣靡所不之將真人之似禦寇乎抑禦寇
之同真人乎是未可知也濂因造協晨中寥辭一篇
真人或咏於淵精之區九都眾真當有彈八瓊太璈
來和之者庶幾後天而終可以凋三光者乎至若禦

寇寓言旬有五日後反者微旨已備見其書茲可
畧云辭曰帝青洞真陽太飈恆鬱敷凝神歛上征行
與灝氣俱飛輪入溟滓九光開翠苓腰佩白琥囊吻
薦紫琳腴曲龍有丈人持節下明都噉以八辰祕攝
御萬象初陟彼方文臺大招許瓊暉廓落黃演烝陽
堂明梵樞開明戊己功幽契曲晨機羲娥俯倒影流
光駐熙夷靈集動千載視之若斯須稽首方諸君同
餐燕胎芝請授長生籙浩劫以爲期

予老矣諸書皆忘去此卷雖久留齋中不克題就今